

АРВАН ХОЁРДУГААР БҮЛЭГ

ХАРУУЛЫН БАЙГУУЛАМЖ /ЦЭГ/-ИЙГ НОХОЙГООР ХАМГААЛАХ

Нийтлэг үндэслэл

261. Байгууламж /цэг/-ийн хамгаалалтыг хүч нэмэгдүүлэх зорилгоор харуулын нохойг гол төлөв шөнө, хязгаартай үзэгдэх нөхцөлд ашиглана.

262. 2-оос дээш байгууламж /цэг/-ийн хамгаалалтыг харуулын нохойгоор хамгаалах үед харуулын даргын харуулын нохойн алба эрхэлсэн туслагчийг нохойн ахлах хөтлөгчдөөс томилно.

263. Харуулын цэг дээр нохойг хоногт 12 цагаас илүүгүй хугацаагаар байлгана. Хасах 20°C, түүнээс доош хүйтэнд цэг дээр нохой байх хугацааг 6 цаг хүртэл богиносгож, энэ тухай харуулын дарга харуулын нохойн томилолтын бүртгэл болон харуулын хуудсанд тэмдэглэнэ.

264. Байгууламж /цэг/-ийн хамгаалалтыг хүч нэмэгдүүлэхээр нохой байлгадаг тусгай төхөөрөмжлөгдсөн газрыг **харуулын нохойтой цэг** гэнэ.

265. Харуулын нохойтой цэгийн тоог хамгаалах Байгууламж /цэг/-ийн дарга тогтооно. Харуулын нохойтой цэгийг гадна талын хашаа /цэг/-наас урагш 80 метр хүртэл зайд, хамгийн аюултай дөхөц газарт байрлуулна.

266. Харуулын даргын харуулын нохойн алба эрхэлсэн туслагч нь харуулын даргын захирамжаар нохойг цэгт хуваарилахад харуулын даргын туслагч, манаа халагчийг дагуулж явна. Нохой хөтлөгч бүр 2-оос илүүгүй нохой хөтлөх бөгөөд нохойд хамгаалалтын хошуувч заавал өмсгөнө.

Нохой хөтлөгч нь цэгийн төхөөрөмжийн бүрэн бүтэн байдлыг шалгаж, нохойг уяанд бэхлэн түүний хошуувч, оосрыг авна.

267. Нохойг цэгт хуваарилж дуусмагц харуулын даргын нохойн алба эрхэлсэн туслагч энэ тухай харуулын даргад илтгэнэ.

268. Харуулын дарга цэгээс дохио хүлээн авах буюу нохой хуцахыг сонсвол цагийн байдлыг тодруулахаар харуулын нохойн алба эрхэлсэн туслагчаа болон тухайн цэгийн нохой хөтлөгчийг яаралтай явуулна.

269. Үүр цайх үед харуулын даргын харуулын нохойн алба эрхэлсэн туслагч, харуулын даргын туслагч, манаа халагчтай хамт очиж нохойг цэгээс буулгаж, байнгын байранд нь хөтлөгчөөр хүргүүлнэ. Харуулын дарга нохойг цэгээс буулгах буюу солих тухай зааврыг харуулын нохойн алба эрхэлсэн туслагчид өгнө.

270. Харуулын нохойг маллах, бэлтгэх, түүнчлэн харуулын нохойн цэгийг төхөөрөмжлөх, цэгт байгаа харуулын нохойг шалгах журмыг тусгай зааварт заана.

ХАРУУЛЫН ДАРГЫН НОХОЙН АЛБА ЭРХЭЛСЭН ТУСЛАГЧ

271. Харуулын даргын нохойн алба эрхэлсэн туслагчийг харуулын нохойн ахлах хөтлөгчдөөс томилно. Тэр харуулын нохой хөтлөгчийн үүргийн биелэлтэд хяналт тавьж, нохойг цэгт цаг тухайд нь хуваарилах ажил хариуцна. Харуулын бүрэлдэхүүнд орсон нохой хөтлөгч нар түүнд захирагдана.

Харуулын даргын нохойн алба эрхэлсэн туслагчийн үүрэг:

271.1. харуулын нохойн цэгийн байрлалыг сайн мэдэж, цэгт нохойг хуваарилах ажлыг биечлэн удирдах;

271.2. нохой хөтлөгчийг харуулын нохойн хамт цэг рүү явуулахын өмнө нохой хөтлөгчийн үүргийн мэдлэг, нохойн тоног хэрэгслийн бүрэн бүтэн байдлыг шалгах;

271.3. цэгт нохойг байх хугацаанд тэдгээрийн байдлыг 2-оос цөөнгүй удаа шалгах;

271.4. харуулын нохойн томилолтын бүртгэл хөтлөх.

ХАРУУЛЫН НОХОЙ ХӨТЛӨГЧ

272. Харуулын нохой хөтлөгч нохойтой цэгийн бүрэн бүтэн байдлыг хариуцна. Тэр харуулын дарга, түүний нохойн алба эрхэлсэн туслагч / томилогдсон бол/-д захирагдана.

Харуулын нохой хөтлөгчийн үүрэг:

272.1. харуулын даргын нохойн алба эрхэлсэн туслагчийн зөвшөөрөлгүйгээр гадагш явахгүй байх;

272.2. нохойтой цэгийн байрлал, тэнд үүрэг гүйцэтгэх нөхцөлийг мэдэх;

272.3. ээлжийнхээ харуулын нохойтой цэгийн байрлал, нохойн зан араншинг мэдэж байх;

272.4. харуулын даргын нохойн алба эрхэлсэн туслагчийн тушаалаар цэгт байгаа нохойн байдал болон цэгийг шалгах;

272.5. цэг дээр илэрсэн зөрчлийг /оосор, гинж тасрах, нохой оосорт орооцолдох/ арилгах арга хэмжээг нэн даруй авах.